

52
L'HOMME
INDIFFERENT,
EN VERS
BURLESQUES.



A PARIS,

Chez G. S. rue des Cordiers, proche
Sorbone.

M. DC. XXXIX.

57

THOMAS

INDIFFERENCE

352
F


ENVELOPS

39

326


BARLESTON

1649.525



ALMA

M. D. C. C. C. C.



L' H O M M E INDIFFERENT, en Vers Burlesques.



V diable soit ce mechant homme,
Qui nous est arriué de Rome,
Si jamais nous ne l'auions veu
Le François seroit mieux-pourueu,
Et ie jure que le Sainct Pere
Nous eust fait vn meilleur affaire,
Si le laissant delà les Monts
Il nous eust donné des Pardons.
Fol est celuy-là qui se fie
Aux traits de sa Philosophie,
Car bien qu'il soit plus ignorant
Qu'un Lievre qui dort en courant,
Pourtant il a trouué l'adresse
D'auoir & l'argent & la richesse,
Et comme en depit du bon Dieu
Le Cardinal de Richelieu,
Luy fit rencontrer, non l'opale,
Mais la pierre philosophale.
Ie deteste de voir mon bien
Deuenu tantost presque à rien,
Et me desplaist fort que ce diable
S'en soit fait vne bonne table,
Pa uures François, que ie vous plains,

A ij

Ce n'est que pour vous que ie crains,
 Car pour moy dans l'indifference
 Je ne crains rien que pour la France,
 Mes interrests sont tous passez,
 Mes moyens sont desamassez,
 Mes plaisirs s'en vont en moutarde
 Je n'ay plus rien qui me regarde,
 Et ie suis plus indifferent
 Qu'un homme qui s'en va mourant.
 Pensez-vous quelle étrange enuie
 Tourmente mon ame & ma vie
 Je suis tous les jours dans le dueil,
 Et n'attens plus que le cercueil,
 Tant ie vois mes tristes pensées
 Mal prises & mal entassées
 Voguer d'un & d'autre costé,
 Tantost mon esprit arresté
 Me fait desirer vne chose,
 Et tantost pour vne autre cause
 Je desire ce qui me nuit,
 Mes jours ne sont plus qu'une nuit,
 Et comme dans l'indifference
 Je vois les affaires de France.
 Mais enfin ie suis resolu
 De faire comme Goguelu,
 Et de jouer mon personnage
 Comme faisoit cet homme sage.
 A propos cette occasion
 Me fournit vne allusion
 Car il me souvient bien de l'heure
 Qu'Escolier j'auois ma demeure
 Dans le College de Lyfieux,
 Mon disner alloit vn peu mieux,
 Je me fasche bien que ma table

A ce temps-là n'est plus semblable.
 Dieu ! que j'estois plaissant alors,
 Quand ie voulois j'allois dehors,
 Quand j'estois reuenu de classe
 Je n'auois qu'à prendre la tasse,
 Et mon dîner tout appresté
 M'offroit la crouste de pasté.
 De plus quand c'estoit la journée
 D'auoir congé, l'apresdinée
 J'allois jouier dans le tripot,
 Et puis a l'ombre d'un fagot
 En contant toujours la sornette
 On me frottoit d'une seruiette.
 Quelquefois au temps chaloureux
 J'allois derrière les Chartreux
 Ou bien dessus cette terrasse
 Qu'on nomme le mont de Parnasse.
 Le soir quand j'auois bien souppé,
 N'ayant mon esprit occupé,
 Que de plaisir & de delice
 Je courois chercher un complice
 Qui vint avec moy sur le tard
 Voir Tabarin ou Gratelard.
 Le soir libre d'inquietude
 Je reuenois dans mon étude,
 Où mes esprits estoient contents
 De tous ces diuers passetemps.
 Mais, Dieu, que ie suis en colere
 De voir maintenant la misere
 Qui me presse de toute part,
 Et que ie n'ay plus un seul liard,
 Car ma bourse, en dépit d'Ouide
 Dans la Nature fait du Vuide.
 Mais pourquoy me plaindre ! en effet
 C'est un mal que le sort m'a fait,

t j'ay bien d'autres Camarades
 Qui du mesme échec sont malades.
 Tout ce que ie trouue à cecy
 C'est de rebutter le soucy,
 Et le mieux qu'il sera possible
 De rendre mon esprit paisible.
 A quoy faire de m'attrister,
 De gémir & de lamenter,
 D'auoir touîjours la bouche ouuerte
 Pour pleurer & plaindre ma perte,
 A la fin du temps ie n'auray
 Plus de moyens quand ie mourray,
 N'ay-je pas vn fort bel exemple
 Si dans mon esprit ie contemple
 Les Princes & les grands Seigneurs
 Qui cherchent d'auoir des honneurs,
 Au lieu d'acquerir des richesses
 Ils ne trouuent que des tristesses,
 Des rebuts, des peines, des soins,
 Nos Generaux en sont les moins,
 Que la guerre à cette heure priue
 De leurs Palais, & ville. Iuifue
 Leur fournit tous les jours des toits
 Que l'on romproit avec les doigts.
 Ils sont tous les jours en campagne,
 Soit pour donner ordre à l'Espagne,
 Soit pour la guerre, & pour fournir
 Des Soldats à l'entretenir.
 Pour moy ie dirois sans feintise
 Que ce seroit vne sottise,
 De se donner tant de soucy
 Pour le bien qu'on pretend icy.
 Si ce n'est que ie les auouë
 De vouloir mettre sur la rouë;
 Ou plutôt de faire chauffer

Ce Mazarin, ce Lucifer
 Contre qui tout le peuple gronde
 Tout par tout où la terre est ronde :
 Aille donc tout comme il voudra,
 Mon ame enfin se refoudra
 De n'avoir plus aucun partage
 Avec eux, s'ils n'ont l'avantage,
 Et ie ne me veux plus mesler
 Ny de reuenir ny d'aller.
 Que le monde se bouleuerse,
 Qu'il aille tout à la renuerse,
 Que le mal tombe dessus moy
 Ie n'en veux plus auoir des moy ;
 En fin que le Comte Guillaume
 Veste contre nous son Heaume,
 Ou qu'il nous vienne secourir,
 Il ne m'en chaut plus de mourir.
 Venez-çà, comment, ie vous prie,
 Pourrions-nous auoir quelque enuie
 De continuer désormais
 Vn temps si priué de la Paix ?
 Vous souuient-il de la journée
 Que la Reine trop obstinée
 Sortant du Temple avec le Roy
 Nous voulut donner de l'effroy,
 Et pour témoigner sa puissance
 Troubla nostre réjouissance ?
 Le peuple alors, bien qu'il courut,
 Assez à temps ne secourut
 Ce Conseiller si venerable
 A tout le peuple desirable,
 Mais seulement trois jours après
 On en pût auoir le progrès.
 Le Ciel y opposant sa force
 Alluma la premiere amorce,

Le feu s'est fait depuis si grand,
 Que sans aucun reïne de il prend
 Par tout où la flamme allumee
 Porte l'horreur & la fumee,
 Je ne sçay si ie dois penser
 Que ce trouble doive passer,
 Ou si j'auray bonne esperance
 De cette longue Conference,
 Dieu fuisse que tout aille bien,
 Pour moy ie ne veux dire rien,
 Et desirant l'heur de la France,
 Je veux viure en l'indifference,
 Occupant mes vœux & mes cris
 Pour le bon estre de Paris;
 Les vns ont leur vie occupée,
 Soit aux loix ou soit à l'espée,
 Et les autres font plus d'estat
 D'estre les Ministres d'Estat,
 Mais moy j'ayme mieux faire croire
 Que ie ne veux point tant de gloire,
 Et qu'il suffit à ma raison
 De demeurer en ma maison:
 Car pour moy i'ay cette maxime,
 Que ie ne trouue point de crime,
 Qu'un homme prolonge ses ans,
 Et pour viure vn peu plus long temps.
 Qu'il soit poltron, ie veus dont viure
 Dans ce dessein, & le veus suiure.
 Puis voicy qu'on parle de paix,
 Je pouray viure désormais
 Dans mon humeur indifferente,
 Bien que ie n'aye point de rente,
 Pourueu que ie sois en repos
 Je viuray gaillard & dispos.

F I N.